

Maximus ketua parti politik terakhir menghadap YDP Agong hari ini
Astro Awani
11 Jun 2021

KUALA LUMPUR: Presiden Parti Bersatu Sabah Datuk Seri Maximus Johnity Ongkili menjadi ketua parti politik yang ketiga dan terakhir diperkenan masuk menghadap Yang di-Pertuan Agong di Istana Negara hari ini.

Terdahulu kenderaan yang Ahli Parlimen Kota Marudu itu naiki, dilihat memasuki Pintu Dua, Istana Negara kira-kira 2.16 petang tadi.

Difahamkan Ongkili, yang juga merupakan Menteri di Jabatan Perdana Menteri (Hal Ehwal Sabah dan Sarawak) itu, akan membawa pandangan mengenai Proklamasi Darurat serta isu-isu berkaitan.

Terdahulu sesi pertemuan antara Tuanku yang memasuki hari ketiga hari ini, dimulakan dengan Presiden UMNO Datuk Seri Ahmad Zahid Hamidi pada pukul 9.55 pagi, dan pertemuan berakhir kira-kira sejam kemudian.

Ia kemudian disusuli oleh Presiden MIC Tan Sri SA Vigneswaran yang dilihat memasuki perkarangan Istana Negara kira-kira 10.50 pagi.

Sementara itu, Ketua Menteri Sarawak selaku Presiden GPS Datuk Patinggi Abang Johari Abang Openg akan mewakili Parti Pesaka Bumiputera Bersatu (PBB) dijangka akan menghadap Al-Sultan Abdullah pada Isnin secara dalam talian bersama pemimpin lain dari pejabatnya di Kuching, Sarawak.

Abang Johari dalam satu kenyataan pada Rabu mengesahkan Al-Sultan Abdullah telah memberi perkenan.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-politik/maximus-ketua-parti-politik-terakhir-menghadap-ydp-agong-hari-ini-302710>